

四庫全書

集部

欽定四庫全書

秋澗集卷四

元 王惲 撰

五言古詩

遊百家巖四十一韻

兩紀山陽城行役凡七過佇瞻百巖雲屢往屢不果
亭白塔顛望遠幾招我今秋若有相老攬脫籠鎖二三
會心友與遊無不可初從萬戶門迤邐陟層圻石林轉

幽深到寺氣幾悞截雲駭巨屏勢軋坤軸妥天闕瞰絕
巔黛色潑峻朶三纏上杳冥兩袖巧包裹谷深餘繚曲
石怪欲垂韞何年緇衣徒詩境闢飢顚或疑巨靈斧擘
削乃爾礪僧殘失珠寶寺圯驚甌墮寒猿從何來跳踉
百十箇近人不少怖掇拾落殘菓有草名龍須纖潔豈
容浣崖絕不可攀殆似銜奇貨最憐明月泉流瀉不細
瑣玉虹貫山透噴灑螭口拖我嘗遊三嵎景氣固云奇
未有此泉勝翕合瑤峪大恍疑神物潛供飲結僧課排

徊醒酒臺石老書字婀娜憶當沉酣時萬象入眺卧八荒
敞庭衢日月螳旋磨下視區中人宜為螺與贏復尋淬
劍池履巖不辭跛澗黑不可渡悵望藉草坐山僧似嗔
余空踏苔蘚破萬擲霜葉丹鍛竈烘熾火有懷中散公
材大識或磨至人戒其偏康銳不自挫當時朝右奸如
會鬼見唾吹毛不此施淬礪安用那徒為論養生竟落
非命禍長歌下山門世累訝許夥寵辱未足驚門閭續
弔賀吾須人為徒長往非所荷正煩日用間克我偏與

頗賦詩約重遊備豫木客和

謝王中丞惠柏栽

我家西河阡清陰不多植白楊風蕭蕭萬葉空夏擊君
家手種柏蒼幹照城壁移栽滿山丘鬱鬱歲寒質丐餘
補不足雅意許波及恣取不我貪廣種庶多得慇勤教
之法水土要相適又云樹平壤根柢雜沙礫蒼宮雖鬼
庭在木躋壽域根蟠泉窟深氣接太行碧佗時兩喬林
黛色看千尺大招遠遊魂納此衆香國百年見諸孫鵲

立太陰黑若問物從來渤海王氏出

飼牛辭

我性本疎拙壯年樂郊居况茲二頃田近在城之隅兩
紀官為家耕牛老無餘秋翻已失計春種烏可虛浮陽
漲林垆我剛猶荒蕪傾囊買雙牯却杯與壺齒歲固
云穉野牧多形癯角浪黯無光寒毳躁不濡服耒試墮
頭喘息久未蘇田家作雖苦大本誠在渠嘗聞老農言
力盛出壯軀時時過皂隄付囑飲食勗早晏日有常鎖

屑豆與芻均勻細為和回噍皆至腴顧立終所舐對之
為嘻吁半生遊宦間代耕竊官租雖乏濟物功遇事多
直愚鬪怯公戰勇不知夏畦諛古人發畎畝開務荷天
衢有莘伊衡耕南陽孔明廬大賢吾敢望恥作遊說徒
咄哉奚戚輩販鬻庸自污百里西入秦炊虀感妻孥養
生五穀皮其志還自如越褐不掩骭夜半歌嗚嗚應憐
南山粲中有尺半魚一朝遇霸主立談開遠圖我歌意
有在歸來事耕鋤水溢繼旱乾二年儉鉅儲力田漢重

科躬耕需壯夫我老理當佚反與若等俱塗霑固不及
風日儘瘁枯筋力日衰耗毛髮不滿顙平頭七十數溫
煖帛肉須舉家二百指張口待爾鋪田間一笑起謀生
太區區非闢效周人白首悲窮塗庶配耒耜經因之補
叢書

種蔬

風人憫東周饑饉何薦臻一飢未為窘二事何並云當
其穀歉時一菜真偏恩減粒倍蔬茹儘足濟餓貧我田

在溪曲有圃逾一廛十年廢不治草闌野并胥飯糗日
兩孟舉按蔬為先顧瞻畫叉手日食無幾錢甘受宣父
誚課兒斲荒烟嘗聞饑不驚示貶中書堂況我田野人
鄙事亦備嘗東家乞蔬子西家學種方分土作長塍繚
垣為周防劬勞不旬時綠畦變天荒朝來見生意次第
青與黃春韭存夜氣夏葵茁屯芒努力辦一飽藉爾為
半穰大哉烈山柱濟物心遑遑草木別真味擴充神祖
嗜雨露天地恩水土仍君王智能創而述功用有至藏

皇風眇無及庶物昭回光配社德罔極萬代詎可忘

餞王和之北還

王郎自燕來不見凡四載拜起寒暄餘命坐至於再靡
然衰俗中持身敬勝怠出言口不能遇事意何慨瀾翻
譯語詳宛轉刀筆快幾年民部間奔走事多賴負責在
人先利心非所在所以郎曹官倚用例深愛竭來衛南
鄺治任將北邁為余閒著書論說餘教戒探微尋墜緒
發源疏九派贈言為至榮在公猶警歎賤名見諸編儘

足光四代常觀長厚人往往福未艾行矣愿所守揚名
此無外芸香霏版籍鴈署雜書袋飛翔得所止早夜更
匪懈會當長安陌軒翥看冠蓋

汲冢懷古

丁亥歲三月十八日觀稼西疇遂至伍城抵安釐王
陵下歸作是詩者蓋自江左平後竹書多傳於世余
憂好奇攻異者讀之恐有致遠汨泥之弊故不得不
辯云

涵迤伍城郡背水猶陣圖魏陵廢已久磅礴如覆孟草
樹慘不春穿穴狐狸墟我來登其顛懷古心躊躇憶當
戰國際安釐亦狂且澤麋被臯比坐為秦人驅敗亡自
此始保邦何乃踈不知身後藏安用書十車上窺奴與
商下逮蒼周書汗漫亂竹簡詭說何紛拏征南辨已詳
多出行怪徒稽古不適正死為毛穎誣其中亟當辨阿
衡被夷誅孔子修六經亦已防奸污大書一德後薨葬
開毫都在易最奇法安取理所無茲馬萬世程洋洋真

聖謨何煩事幽蹟致遠泥所趨長歌望陵去樂過風乎
零

壽弟監使仲略

淇澳望鄧鄙迢迢千里途吾弟官其間筠林辦公租十
年幾兩見聚散何須更今歲乃天幸同歸在鄉閭朝昏
對無時談笑樂愉愉春風露堂飲盤餐雜肴蔬絲竹厭
啾聒却去從歌呼曾及兩耳熱仰空作嗚嗚張燈更大
白要盡壘與壺都將積年懷一洗中無餘健倒不知曙

醉頭同與扶扣瓶得餘醞忘却公堂趨

時以事
候府下

兩宵對

牀眠百篇詠徐徐靜聽未容再恍陟西崑墟鬼窟易作

計犬馬艱為募吾弟擅所長愈吟辭愈都意圓兼理到

韻遠幾風疏宛從尋常中奇倔驚專車又如荷盤露細

大皆成珠章郎五字吟花樹欣遊車今夕復何夕香滿

先世廬近復示新作篇篇商起予玉美韞櫝中得價不

待沽倡者凡幾輩賞識風雅殊今者重有喜不為文字

娛君今知命年我亦耳順踰素髮各滿領不樂復何如

況逢初度朝怡怡與之俱膝下分戲綵朋徒日依於我
有一尊酒殷勤三禱渠一酌願君壽金石堅不渝再酌
官事利百谷為一攄三酌日康寧神相千金軀貴富天
所與道義我所儲居閒未落寞畏途足崎嶇家理即邦
政緊孝與友于長歌復一杯此外非吾圖縱詩皆漫與
此詩吾特書

酬紹開提刑見寄原韻

我老不足畏閉門欲誰親案頭有遺經卷舒無時句平

生未嘗學於馬究彞倫既非目擊者補拙需以勤其或少有得庶浹羲和春吾子四科哲勲名逐時新邇來亦斂翮淵潛思自珍有時縱諧笑傾倒冠與巾豈知寄傲餘落筆摛雄文客來示新作郁郁皆卿雲

擊訓狐

訓狐本惡鳥飛潛林谷間眎夜反為晝聲勢何軒軒矜凶聚妖異其氣幾神姦家僮夜得之縛致庭階前目光爛兩炬狂躍倖一騫羣兒顧之駭四走入席眠我因為

沈思善惡以氣宣古云鷹隼輩不如鳳與鸞以茲惻隱
心遠彼凶與殘胡為止我屋夜半呼聲乾女奴前致辭
此物何足患西家養已久逸飛偶翩翻內疑始冰釋念
之心稍安緬懷昌黎公心炳陽烏丹彎弧親斃之絕類
不使蕃揮策碎厥首亦與韓意然長令杖端血著此一
綫殷比跡於段笏異世同不刊起視夜何其斗插西南
天蒸雲變曉黑漠漠來輕寒

明農亭

我田僅二頃近在清水涯宦遊苦不巧歸來把鋤犁樊
須被聖闢彼士當有為時有利不利一飢胡可醫士而
食其力安分至極宜繫予事農圃三歲慘不怡四郊氣
隆蟲澗毛成悴萎釋耒得窮處日坐詩書癡樵蘇甫有
積瓶儲復無幾餬口恐不給奚暇卒歲衣明農榜新亭
此意空規規有懷靖節翁起為三徑資分種秔與秫一
稔欣有期豈知事大謬折腰困儉微斂裳即宵逝一粒
不入頤蕭然環堵間老飢日相持九華安足服嚼句充

朝飢士貧理雖常念之令人悲空餘身後名萬古流清
輝天運既若爾吾道將安之過此或有作殆與天相違

怪石辭

巉巖荒谿石濁滓凝太古顧雖一拳小岌立有足覩牛
神兩顛撐山魍一足挂移來夸娥擔劈截巨靈斧蒼雯
裂荒寒老峽濯秋雨千年洪水餘石浪尚掀舞又疑秋
江蛟蛻骨委幽渚却愁出雷火下取還洞府要從五色
族軒鼎入練煮元精儻不克備豫女媧補從渠置散地

不第奇章譜

疇昔一首寄胡紫山

戊子十二月二十二夜

疇昔夢紫山燕集街西居又撐瓦傘底一笑春帖餘四
顧盡佳客半是高陽徒紫山正襟坐手把一卷書疾讀
且稱嘆照眼皆驪珠乃云某近作商也真起予吾儕惜
無幾炯如曉星疎正須佳眠食善保千金軀別久得一
會喜與老叟俱呼兒具罇酒張燈列肴蔬觴予不數行
致辭前見掄平頭七十數眉毛雪模糊投閒天或憐有

書心便娛又云悼亡來不以再娶圖老懷固鰥鰥宿業
一掃除殘年累幸輕恐是得壽符敘濶夜向深對牀卧
斯須輾轉寤寐間恍然到吾廬春明煥庭軒門繫雪色
駒倏忽坐壤舍意若傷道污彼豈能我挽高氣初自如
體融合若一樂適歸不殊安得自伊始終歲同步趨或
乘款段馬或駕下澤車春風十二窩醉墨翻瓊琚相看
以佚老脫屣榮與枯夜寒薄重幃夢清誰遣呼枕邊有
鐘鼓鏦鏦應更壺起聽夜何其漏下三更初念茲夢何

異自況良可吁紫山俯秋澗玉峰映污渠固知瞠其後
庶可山澤臞援毫記所遇一字不敢渝代書寫離索涸
魚聊自濡何當拊素箏醉將桓侯鬚

取其使君
不凡之意

元日吟

深院咤祭餘黎明紛賀拜齊飲藍尾杯傳嗅辟瘟醵獻
歲事多宜晚景福未艾鄉隣最善禱有錢無病害兒童
樂新年添歲漸壯大老人死生忙應接筋力憊元正貴
清明其占君子泰多連人日陰野老足吟嘅今年天氣

晴日色暄可愛相竿絕微風羲馭飛火蓋牆陰凍全消
水陽冰自壞布席坐前簷欹傾餘醉態一冬苦凝沍乍
暖欣曝晒頽然曲肱眠夢到華胥界宿醒與臘嚴融暢
無內外放教原壤肆大豁伯夷隘溫溫泰和湯股痺為
一差覺來喜不勝嚼有屠門快持美欲獻君癡絕覬霑
丐

嗟哉傳生行

客從大梁來投刺謁蕙帳再三相之坐氣貌何骯髒袖

攜一卷詩照映青藜杖起立懇予觀詩竟見雅唱傳生
南樂人明兩自幼喪聽官奉心君入耳物能狀曖然內
含光記誦殊通暢我思篤廢人氣志多散放苟能養此
軀那記非所養傳生痼而卓出入知所嚮不學陰陽流
甲乙肆虛妄復惡鄭衛哇恥列師瞽行六經天浩浩義
理無盡藏游心於其間取友千古上古人不復見古心
胡可忘古心果云何姬孔乃心將循夫天理公絕去私
慾王神光滿牛背安取內外障師傳庶西河真識或晉

曠不吐張籍奇猶可祖珽相世人非禮視外蔽內隨蕩
思屏心過易眼過最難愴一根塵幸空內動息孟浪作
詩還自笑示勸隨彼量大匠無棄材長短皆有望文昌
藉終譽尺書軍欲張豈知我非韓徒增山斗仰

處暑日偶書

丙戌歲七月

長夏便幽居動靜得交養杜門遠炎囂人事息來往三
年謝簪紱倦鳥脫籠網生涯書滿屋汎覽極遐想欣然
歎有得志却折俎饗一涼沐新恩允治多峻朗殘暑竟

餘熾木葉曼清響好風從西來一雨為滌盪氣骨增老
健締綌餘爽赫然酷吏去而得故人訪草木行變衰
騷客重悲愴况復迫暮景歲月驚俯仰浮生太奔忙壯
志非昔曩時至氣自衰心在不忘嚮要知配義剛每戒
握苗長人生老當佚我老事耕壤有田不及蘇開徑謾
希蔣一貧非所憂俗事苦紛攘娛心筆補袞甘分詔居
艱茲焉庶有成心體日胖廣窮兒即暴富孰羨軒冕儻
何煩問大鈞自斷示諸掌敲門看竹來一笑豁心賞

秋雨申書懷

秋氣何沍寥寒序變淒渰木葉與時謝芳菊得秋再生
涯無少營書史有餘覽靜尋古人心理亂見忠諂薄田
待耕食雖苦猶嚼攬稍豐不外求卒歲飽羹糝既獲飯
蔬樂又免素餐忝吾儕當壯年頭角露蘄蘄一為客氣
乘前進率勇敢才行有所憂欲止不容憺尚恨才術疎
而不大其膽隨即事變來長網驚一掩天意深有惜不
遣入習坎委心聽自然致用每縮斂宦巧輸晉衍戇直

終漢黜世途伏莽間舉足中機險虛名竟何用抵事纏
壕坎唯餘讀書心連綴若紃紃秉德思一心覺衰誠多
感古人了婚嫁家事斷不攬賢哉靖節翁歸卧斜川崦
怡然擁敗絮一笑慰佟儼多生各有分過慮讓憂貶當
時曠達懷樂過鼓瑟點因復念涪翁亦厭俗累染異世
同其流漆板書何醅青山與白雪江湖渺而湛終古無
少異曾有不足窅窮年為形役膏火自煎歛齒髮況日
衰神情豈任晻正須慎圭璧不致有瑕玷惟天有盈虛

金匱要略卷四
賦分自豐歟天運審如此終老樂貧儉世或昧茲理遇
塞強鑄鑿我恐傷天和作詩時自檢

餞侯敬甫還汴

侯君司竹君調度

去聲

纔年半去春特停罷公私或云便

繼差上官來新舊盡交散衣袍到緼縵未免積垢綻支
持一載強非汝不易辦天姿公戰勇奔北獨與殿昨從
汴梁來相過為飲讌坐間出片紙喜色睟於面乃云監
復立將集此微霰財賦至復任斯人不多見愀然忽變

容不覺當饋嘆操刀截鼎肉有味誰為雋半生媿茲心
而向此中轉若來期半歲整示見關鍵蠲潔七賢譏去
應一鶚薦脫落小規為追逐接時彥擬憑素所懷高舉
酌吾願仍說解由事不了無一件俄爾來告別牽率復
還汴祝余贈言榮歸代賓朋羨慙聞君所談行止渠自
判何庸待余言樂處戒久戀最哀同寮子臨事本怯悞
壯士被蜩螫慷慨有解脫懸絙即自經而釋身後患更
無拙計人一死循鳧貫常嗟白面生時務少諳練大概

說不差節目多自絆米鹽瑣屑間居之要無倦君看韓
侍中張本府推幹行矣夷門侯前途況多援髮壯吾舌
在橐鑿志曾變花樣又時直何患不光炫

望崧吟

至元丙戌長至
日追作二十韻

往歲試洛師憶與節齋約同作崧少游心賞為一豁羸
驂鞭欲前竟為事所却宛循洛水東馬首眺陰壑洪濛
元氣湧磊落雷雨惡不有此峻極安得雄四岳只緣不
得登萬象負酌酢諸峯罷六六景氣終慘錯披榛入會

靈宋離宮名吟倚廢宮角陳公最健者師可三軍奪空餘墜

仙興

出世說

飛墮迷嶺嶢歸尋黑石渡易駟指鞏洛行行

嘆不勇失此寧復作吾儕貴乘時過慮自羈勒至今有
餘恨夢繞神崧脚盤空轉危磴矯首看飛閣探穴不知
畏入室不挽葛茲焉即神清洞戶四開濶山人喜余至
供具為止泊會凌列宿嶺一笑動寥廓

宣城筆

己丑秋八月三十日晨起試宣城筆前一夜夢對御

陳事故有入閤侍立之語

江夏無雙公翰墨能事畢平生稱快意揮洒得此筆圓
如棗心大銳比囊穎直橫馳屈產良細挿蜂脊悉鋒柔
得字易心勁腕能適赤管纔握餘貶削失勅敵策勲嫺
中山落紙生五色或簪豸冠霜或泚螭首墨入閤與贊
書侍立天咫尺雖非山甫儔萬一補衮職

賦襄邑蒸豚

尹劉濤字君玉子為都司
時部提控令史相州人

我行錦襄野田間多牧豚不沾欄笠溷不識糟醪渾渴

飲兔苑溪飽嚙香阜根所以味佳美萬有空其羣故人
得劉宰紅蒸具盤飧依淺食不饅體芳腥未聞今日復
何日大嚼過屠門他鄉固肥腴性燥空突奔有時嚼其
肉一筋增餘惛乳烹謝晉豪禁鬻未必尊柔毛詫沙苑
盛餐厭羶葷未減貨所饋往拜禮合殷物產貴得地橘
與枳遽分藍田異崑丘而別璠與珉人生與物殊善變
觀鵬鯤

雙廟懷古

鐵輦動地來獵火燼九縣睢陽東南衝江淮國所援蔽
遮不使前恢復可立見二公明此機死守誓不變雖危
所保大如蝨螫解腕最難結衆心存沒匪石轉彼蒼界
全節誰為落賊便已矣君不忘握爪掌為穿竟能濟中
興淮海了清奠至今忠烈氣皎皎白日貫賀蘭觀成敗
不飲浮屠箭殺亡計多寡此論誠可辯我來拜遺像凜
對如生面乞靈激懦衷剴決剛同鍊朔風大樹聲尚想
登陴戰暮依暈月城悲歌淚如霰

虞姬墓

在靈璧縣東三十里虹縣道南陰陵山北舊有廟在山上今廢

重瞳鮮情人鍾愛獨虞美五年有天下寵幸想無比一朝走陰陵楚歌聞四起君王大事去飲訣共歎歎感君伉儷恩死不為漢鬼一丘鳳陽東粉黛見石紀空餘山頭草纔歌葉披靡定應月下魂長繞烏江水

江船二詠

蓬

尺簣編黃蘆節次數須隻長短隨所宜張弛易為摘

長者

二十七節 廣二丈餘 一傍繫脚索若網綱總緝北人布為帆南俗

蓬以荻舟師貪重載高挂借風力順流與邈波巨鷁添
羽翮望從遠浦來一片雲影墨亂衝渚烟開重帶江雨
溼百里不終朝用捨從順適夕陽見晚泊堆疊紛襞積
水雖物善利其助乃爾益

櫓

江船一鉅魚櫓施乃尾鬣當其淵水深棹弱不掇乏故
今施航後前與棹力合濟川具有五此物乃其甲一聲

天際來欵乃中流發我浮大河東並岸行若狎終朝卧
舷間蘭漿但空插緬懷剡木皇智創萬古法

舟宿桃源縣

長路風日淒遠征力難勝捨鞍事舟行庶便寢與興蓬
底坐秋江慢如在韞鷹有時縱遠目汎若孤槎星河從
西北來勢建東南瓴萬艘水上下浩浩無時停利名任
風波醉著誰復醒間看兩岸移轉盼烟中汀晚泊桃源
下波光亂漁燈靜卧船舷間拍拍風水聲舟人話夜潮

使君老母驚又云此水樂君其細為聽

劉營田拜慶詩

人生所欲壽有壽貴健安接物心思曠曳履行步艱難

窠日省定此又何足歎耿濟劉營田

字太初

事親有餘歡

母氏壽期頤髮艾顏渥丹步趨不扶杖目視分遐觀怡

神奚服餌終朝例三餐共云子致樂諒自家有閒結禱

見壺儀教兒列時官豈惟一門樂化及濟岱間德盛福

自備百歲到不難朝家重貞靜露恩不時頒行當見旌

崇寵光爛門闌車簾蹙繡額誥錦回翔鸞肩興王與陳
一旦相追攀茲焉荅春暉寸草心能單我詩媿彤管要
作後代看

食鱸魚

鱸魚昔人貴我因次吳江秋風時已過滿意蓴鱸香我
非為口腹物異可闕嘗口哆頰重出鱗纖雪爭光背華
點玳斑或圓或斜方一脊無亂骨食免刺鯁防肉膩勝
海鯨味佳掩河魴燈前不放箸愈啖味愈長張翰為爾

遊我今赴官忙出處要義在不須論行藏倚裝足朝睡
且快所欲償夢驚聽吳歌海日方蒼涼

長至日次赤岸驛

扁舟下餘杭遠客逢佳節呼童起四更理棹未明發燈
前一杯酒持飲聊自悅江行官有程貴重敢中輟此身
得安舒行止聽驅策去冬一陽生露寢樂良夕錫茶雖
草草初不失家食今年赤岸亭野宿雜亂聒鄉闌天一
涯雲水幾重隔殘年無定居餬口走閩越眷焉不無情

念久意為惻兩艤暗浪喧拍拍若鳴咽寄聲紫山翁此

懷多不別

時任蘇州提刑

平望道中

今日風色好舟行喜清和吳江抵嘉興遠不百里過解
衣坐蓬底閒聽吳儂歌大舫從東來帆檣鬱差戔云是
淮海公赴召耽微疴倉皇不少住進棹如飛梭物情忌
太盛從者不得多尚餘蔽川載意氣隘兩河有懷陶朱
公霸業到不磨功成委之去敝屣與棄蠡左顧萬金橐

右顧西施婆可想不可見五湖渺烟波

太安嶺

亂山從閩來勢若萬馬騁六丁闢坤闔通道取此嶺仰
觀已可怖初陟戒太猛乘班事推挽氣鬱頸生癭既升
頗平夷六折到絕頂最慮泥雨滑沙磴足易整俯臨盡
黑澗一漫漲雲影侶於吾年衰不遣見峨眉一山勢兩
殊限隔示外警北登儘坡陀南下峻深井牛肩抵風門
歧束轉幽迫湍泉激南駛噴薄萬壑冷人生此兩足停

輟不俄頃舉緣聲利牽走險不知挺我獨喜壯觀大嚼
快雋永好奇與馮生比較略相等漢家截海表茲嶺乃
內境行人無晝夜關吏初未省徒令踈馬足安用障巨
屏障投大安傳燈火破窗炯吐我胸中奇削此疊嶂梗
此事特遊戲夜久凍生穎控馭稍得宜雖險勢莫逞黎
明叫雲去有懷為耿耿

自淮口抵宿遷值風雨大作


拖舟入清口適喜亂淮碧崔鎮抵宿遷徐行纔半日朔

風殆驚余不爾何凜凜江雲作陣來凍雨矢四集行牽
人力微泥爛漕岸側打頭為旅拒遇淺殆鯨吸波神鼓
餘勇洶洶波浪黑勢張互相薄力進硬與敵欹傾乃平
常簸蕩不少息秋江渺無涯終日困跼踖夜眠任倒懸
晝坐自撞擊試身一葉舟凌轢蛟蜃窟遠道胡為來行
止吾豈必相值當奈何安順險能出有塗莫舟行此語
聞自昔君看坦塗間風浪猶莫測處身苟無方往往半
乾沒居安貴不忘遇險戒無佚所以長樂老進諫及御

失行行入呂梁持守要愈惕

呂梁

呂梁世所畏往往舟碎破我來相其衝說者無乃過南
洪一石垠北梁更么麼水淺但湍急欲上船旋磨更緣
暗石多重載防石左舟空人力衆徑往彼無那豈云水
至柔內涵沉溺禍至人特為名過者戒微墮舟行四千
里冒涉銳盡挫高歌幸無虞猶呼細菌卧寄聲畏塗間
識者當有和



秋澗集卷四

欽定四庫全書

集部
秋澗集卷五
六

詳校官侍讀學士臣沈咸熙

侍讀臣孫球覆勘

總校官降調編修臣倉聖脉

校對官助教臣汪錫魁

謄錄監生臣朱鎮

欽定四庫全書

秋澗集卷五

五言古詩

和淵明歸田園

庚寅冬余自閩中北歸年六十有二老病相仍百念
灰冷退閒靜處乃分之宜辛卯三月十七日風物閒
暇偶遊溪曲眷彼林丘釋然有倦飛已然之念城居

元 王惲 撰

器雜會心者少因和淵明歸田園詩韻以寓意云

寡智空樂水便靜思潛山性既時與戾况復迫暮年適
者事遠役冒涉江海淵意令不家食餬口不問田因之
委順去強顏官府間道遠策疲蹇跬步鞭莫前天幸脫
羈勒放歸垌野烟鄉曲喜我至迎拜衣倒顛雖云有限
軀且遂耒老閒一洗矯拂性俯仰從天然

教授晉鄉旬月間連失三孫

子孫續吾後上繼祖與先何家無子奪與奪非我偏壽

天況彼命賢愚亦偶然生者撲死去死者掇不全又況
諸國屬天折皆債寃不爾造物戲欲見不測權所以達
觀者怡然于其間死者不深嗒生者不溺憐東野昧此
理悲歌淚漣漣負我十年恩此豈達者言延陵合中道
夫子亦悲酸掩坎三市去一慟不復潛曠懷聖為取情
鍾世所嘆懼傷吾子和為擬昌黎篇

響板辭

笙篴雜箏箏芭悲策合蕃唱喧然一堂間餘音胡得抗紅

牙掩自無按拍喜時向響板出新聲激烈極清亮都來
三鬻木手拉若爾壯遠疑啄木禽扣戶何畢剥近驚老
鶴喙頓處振林壑劃然透空去夜靜秋戍柝方能節衆
音乃見終始作我本幽吟人避喧便淡泊奈何將兩耳
聽此終日聒君不見陶琴無絃趣有餘子幼鳴歌死哀
樂

海獺

海氣發異產茲獺世無雙壅頤滿修形被體紛奇獮睛

黃獐攫古喙促歇僑膝斗尾纔尺許直立森幢幢跳踉
顧自見喜極狂莫降夜風動庭草信吠聲爾噉不近穢
與惡不竊鼎與缸勢猛性乃馴見罕人多慊有時威見
齒迫視防嚙撞東坡詠烏喙量移近蠻邦喜公得北還
渡險無濤瀧此犬從閩來氣骨不喙腴厭隨吳獵陸喜
逐龍移龐伴予水陸行足輕音不羖導予為前驅健迅
逾駿駢辭炎得吠雪寢處不夢江堂無紅絲罽欄有碧
蘚椿繫之護燕几足以增雄麗戀主義不與傳書心爾

慙作詩見物性寄傲倚南窗

和曲山遊澤宮感舊詩二十一韻

三代闡判辟菁莪育英材六經治平具致澤需吾儕君
看絃誦堂明新揭橫牌新民果何事五典惇克諧平生
勉勵心雖老時往來名存到實忘過者宜興哀上行意
固盡下效理或乖文章將相科勲業麒麟臺倚席了不
講若人安取哉文憲日如綫逝者不復迴嘗觀亡宋學
丕冒江與淮考亭洎西山兩公生海隈天遣闢異教不

使為妖災前年拜遺像鑽仰心徘徊文明麗東南淵源
公所開至今號多士翺翔與時偕嘗思萬有選細考勲
與階青絲不素養格例空崔嵬棟梁胡可得摩挲到莓
苔萬員備兩紀一夢南柯槐此說誠至論忍使空學齋
人微喙雖尺有言輕薄埃畎畝不忘憂念之傷老懷

韓晉公畫蒼牯出水圖

蒼牯水所喜泳遊溪水中物情便所適頓立不我從但
見鼻吻長可知力挽雄小大制有法驅牽任此童東臯
欽定四庫全書

夜來雨催耕稼功一飽賴爾力高廩歌年豐畫師亦

敦本大意與訓同

用五代劉訓指水牯為黑牡丹事

吮墨變花賞指為

洛花叢妙哉韓相筆遠意老明農

唐邊鸞正面孔翠

邊鸞弄丹青思入造化窟平生雀寫真多作正面筆圓
張金花扇迥與鸞彩匹暖圍姚魏春翠射琅玕碧瑤池
百丈鏡顧影時自惜
綦冠赤墀間朝午見孤立年深粉
色暗元氣悵猶溼遠來米家船復出王涯壁髯溫玉臺

後素有書畫癖一見易以歸不惜金與璧繫君具眼士
鑒定能事畢竹亭展觀餘異夢憶疇昔當時文字祥其
應在此夕

琅山

太行西南來萬馬驚東北奔騰走蛇陣一卷千里碧
娥負補餘弛擔於此息神功見天巧削出千仞壁亭亭
十二峰上與霄漢逼高張巨靈擘羅列黑帝戟枝撐圓
蓋傾間映落景黑或云琅為郎說是郎君石物類無不

偶遠與巫峽匹不爾氣變常萬化無定質巨細一概觀
何異瓜駢折天機我偶泄山鬼中夜泣萬石鎮雞川亦
可稱峻極

望黃金臺有感

樂生與郭隗擬德非同儕九九乃小數正可訓提孩樂
生復國讎強齊捲輕埃燕昭師事隗竟築黃金臺我思
賢王心要罄初始懷在昭固至德贊襄誠衆哉卧龍以
力食躬耕亦堪哀昭烈昧三顧孔明甘草萊一語萬代

譽正獨龐公開鳳皇巢千仞一舉出九垓翺翔覽德下
千年能幾來掾時不易得況復管樂才毅然好賢心無
為古所咍

和紫山題觀音堂山石詩韻

我行滄水陽思有登臨舉佳處得一遊不計寒與暑盛
聞臨水間猶是鄴西園山滋與水潤不識田家苦陰壑
閔靈景石林氣清楚又云龍洞水清可濯纓土我無適
俗韻樂與泉石伍此行應旌招敢覲烟霄侶閒雲本無

心安取濟時雨紫山知幾人夢與邯鄲黍題詩見歸隱
真隱果能否作配不自景賡此山石語

張鵬飛治虎骨為銳插作詩以贈

張侯骨鯁士志節何閭閭英發見早歲智效今埋輪赤
手搏於菟脫略狐狸羣今復切其骨整此烏角巾持贈
壯我氣能復冠惠文吾老無所用胡為走踈踈落麟
鳳網或可解糾紛一薦不可負上有文思君倘遂寸補
去所得亦已殷要當簪此插醉看西山雲

淵明漉酒圖

晉人尚放曠不受羈與東虛高失之傲降志到自辱淵
明性真率順適無矯慙清風凜一時千古仰高躅得錢
送酒家況我新釀熟渴來夢吞江奚計巾一幅有槽不
得壓露頂手自漉清濁即聖賢併欲貯吾腹悠然對南
山夕鳥送以目還我浩浩天世運任伸縮冷然風度林
澹若雲在谷俯仰霄壤間出處一往復過此設有論正
為蛇畫足宛轉出新意便可激流俗不思皇上人方寸

許撐觸欲求先生心用意不當曲縱使欲自況此老烏
可黷吾言誠漫與得酒且兀兀

有懷雪菴禪師

雪菴圓通士我非方外人每來扣禪扉坐暖蒲團春有
時論書翰兩耳聞未聞自笑以技進斲輪非郢斤吾學
師所知師傳吾所珍擅書三十年臨池墨瀟淪手提八
陣法論入三昧神功多誠懸骨勁擢平原筋蹴踏龍巖
勢髣髴黃山真何心山陰鵝不計羊欣裙興來追醉素

堂堂張其軍驚蛇雜走虺入草猶龍奔縱橫與捭闔真
積力可臻具眼世所難雪菴洞無垠道存見目擊靈黠
知見薰孔竅灑有開滌我胸中塵十年風馬牛笏塞未
易耘去冬喜北來將謂晤語頻遠遊久未歸此抱將何
伸懷人敘游藝愧乏昌黎文何如太行道梯空下秋雲

李廷珪墨

墨龍奮晚唐五季相繼出林林歛溪松黑入太陰窟老
奚縮天機萬竈出玄笏松聲玉質堅走硯風肅肅神爽

漆點光湛湛童子目二者既得兼高明宜擅獨妙劑秘
千古何有遇與谷理馨六經笥滿網龍在陸橫罹相國
阨復值永寧酷迨及宣和間千金購無復郁郁蒙城田
文獻世相屬香林秀孫支善繼踐芳躅傳家無長物寶
此一寸玉客居大于年豐潤鄙華屋阮生幾緬屐舜樂
一夔足公餘日摩挲寧使食無肉古人不復作精絕見
此物傾囊任借觀不許一磨倏田郎固淡僻清賞儘不
俗書生臭味同往往溺所欲吾家眉子歛隱隱修蛾綠

客來恣濯玩亦弗容少黷墨不知研良研不沾墨馥譬
猶藏書人終歲不一讀插架徒好觀新若手未觸相看
兩癡絕一笑為捧腹

贈承旨唐壽卿

論士須詣實相馬先其神周秦何貴賤變化存吾身唐
侯金閨彥動有鸞鳳馴飄飄瀚海翮上拂明月輪憶初
識君面轉盼二十春竭來客京師君為玉堂臣時於管
中窺斑斑見其文高適四十韻便與作者隣青紅桃李

場天葩散奇芬有德諒有言君侯性閭閻最愛發策際
不迫意獨臻理明中事機士氣借以氤重念朋友交敬
毅多不倫或者一顰笑意在交相因令人氣最短標置
分畦畛愛君略城府吐詞爛天真不作崖異奉不學游
說秦信厚等麟趾為人解絲琴所以多士間堂堂張吾
軍蹇予自結髮汎愛而親仁當其立事歲亦復求螭伸
長風萬里浪躑躅無縱鱗今雖老伏櫪尚友心猶振都
城交游海因依幾當親如君辱識久辨與陪祥麟人事

有車合對面如離羣徒從搏俎間一笑傾冠巾只今友
道衰耐久將何人相馬論其力取友非所尊天機到沒
減君今九方歎心期既有在形迹不必云因題樂山詠
聊書代吾懃

成德堂詩卷

蹇予客京師詩卷日交至此風近日長珍饌互相餽張
君構新堂乃以成德示再拜來懇予一言願明志成德
以德成何啻餘愷悌德者得于中行已見於外是乃君

子稱實為聖賢事一時扁之者無乃躡等第太朴自六
鑿衰俗日零替剽竊糟粕餘色取仁為利遽然以茲名
豈速蒲盧意意我開入德試說第一義厥修貴有初主
敬聖不易孜孜先此念優入匪難致收功心日休不匱
將錫類會見堂中人事業稱不器

題趙文卿嘉山詩卷

徐公序嘉山衆美掠已竟復傲諸公作落筆先漫應我
雖乏新意不為蛇足賸文卿慷慨士意氣掩趙孟識君

二十年每對豁滯興談喙傾底裏議論老能正以儒乃
暨名以暨實儒行誰為幽并豪虎變伏延炳先賢去世
遠一氣猶包凝蒼蒼嘉嶺山玉立想照映士會懷秦策
宣尼喜衛磬我常登汾睢西眺河山勝延安東北秦得
士敢小鄭彼嘉宜降神英物復趙孕儒暨有顯道孝愛
發天性惟其嗇世用裔遠有餘慶會生甫與申駟牡擁
高乘我詩匪諛辭探賸神理證有子教讀書服此恒起
敬

東征詩

東藩擅良隅地曠物滿盈漫川計畜獸蕩海驅羣鯨盛
極理必衰彼狡何所懲養虺得返噬其能遁天刑遠接
强弩末近誅乳臭嬰一朝投袂起羶裘擁矛矜天意盖
有在聚而勦其萌芽蜂有螫毒大駕須徂征寅年夏五
月海甸觀其兵憑軾望兩際其勢非不勅橫空雲作陣
裹抱如長城囂紛任使前萬矢飛撓槍我師靜而俟銜
枚聽鼙聲夜半機石發萬火隨雷轟少須短兵接天地

為震驚前徒即倒戈潰敗如山崩臣牢最愾敵奮擊不
留行邠烏喙都閭天日為晝冥僵尸四十里流血原野
腥長驅抵牙帳巢穴已自傾彼狡不自縛鼠竄逃餘生
太傅方窮追適與叛卒迎選鋒不信宿逆頸縻長纓死
棄木鬻河其妻同一泓彼狡何所惜重念先王貞擇彼
順祝者其歸順吾氓萬落脅罔治無畏來爾寧王師固
無敵况復多算并君王自神武豈惟廟社靈三年晒東
山殪戎營柳清都人望翠華洗兵雨何零長歌入漢關

喜氣鬱兩京小臣太史屬頌德職所承雖非平淮雅動
盪耳目精赫赫拒撥烈仰之如日星珥筆為紀述發越
吾皇英名穆美常武且莫誇雷霆

覓風字歛硯詩贈侍其府尹

硯本發墨具不爾安用他碧紫暈鸚眼黥黑深宮鴉彼
端類高人風姿固云佳遠韻不少吝清談浩無涯但於
當機時未免思焚拏若或砥礪用茫然手空叉硬則墨
為褪軟則磨泥沙惟歛士之傑體性何交加羅紋與刷

絲一寸皆可嘉回視端溪公有名實則差新安山水窟
澤大生龍蛇舉世被其利有何蛭與鼃山高溪水清其
芒利如礮常聞右軍硯風字琢手奢是名為水箕朶頤
駭哈呀松煤燼無餘惟恐中書丫池寬水瀾漫挹彼如
尊洼陂陀浸半海揮洒生雲霞平生未嘗有夢寐江之
涯君今去為邦過此空成嗟包公尹端州歸不一硯拏
毚肝類安邑一笑春生華書生乞索態殆是心貪邪襴
衡溺所愛竟搽漁陽搗今冬與來春會有泛斗槎雄雩

或雌縵分送張華家

十月牡丹

彰德路監郡沃哩嘉議治甚有聲壬辰秋辭職讓其
叔伊羅布哈中順是歲冬十月新侯府第發牡丹二
本明年秋計吏伯耕香林先生孫不遠千里來求詩
於翰林諸公因首為賦此

玄冥氣折膠草木餘萎悴鄴城樂土郊畫戟清香地誰
留翠被暖小試丹砂藝一枝鶴翎紅照映朝袍貴散彩

冰雪中造物有深意正緣二侯賢撫字見早歲藹然禮
讓餘涵蓄坤靈秘歐九譜花神百種第佳麗落花固芳
妍根盛氣或異春華復冬榮彼祥端可記無乃後來者
踵治更和惠雖云有淺深錫類由不匱奚煩鑒傍州一
段中和氣慤懃將二美千里偕計吏徧求翰林詩擬薦
金盤瑞我欲論五行推測涉茫昧浩浩二氣中事或有
闕繫重榮說紫荆偏反詠唐棣佳花原致祥惡草終可
畏未若中庸篇繼述皆自致栽者即封培傾者隨覆墜

由來哀盛間為善不中廢曰善即胡為不出讓與悌神
明與扶持聲譽日四至君能馴是理獲利餘百倍何翅
天香臺卿雲攜四季

送范葯莊子楚教授嘉興

范君號葯莊杖屨屢來謁坐間話行藏曾是憲幙客投
我詩一編細嚼讀恐徹詩從晚唐來高風日凌折君才
何清峻略不見姜荅渾涵中州氣佳處每擊節朝來又
相過喜色浮兩頰迺云子楚來得調官兩浙南歸行有

日一舸赴吳越懇予送行詩我樂為渠說路教雖冷官
侶緩繫實切化源開兩庠彼秀富才傑朝家急得賢訓
勉宜屑屑一門在清流聲譽儘昭晰君雖客京師破帽
幾風雪兩掾省東牆一片江南月羈栖思不無相視為
一豁君歸稍如意晝日抵三接何俟老夫詩長路綯行
色

贈大同利彥祥

金天一氣鼎以理乃為義兼包體用言蘊蓄和與利弘

居大同東去都為近地風塵雜四方豪貴猶大魏聖賢
貴有教初不限氣類彥祥孕金鼎用雅變華裔敝衽昨
過門偉矣髯卿麗開談一老僧略不見本氣諒知六合
表固多瑚璉器示予野齋辭把玩愛不置丹書寫虛影
經史含至味舍此或與彼恐墮為善志因將與進心更
擴讀書意周邵兩邠產文獻垂萬世由余出西戎斯也
以賢議吾賢即能賢此論古不易守之有餘師何俟吾
言贅

贈筆工張進中

書藝與筆工兩者趣各異工多不解書書不究筆製一
事互相能萬穎率如志進中本燕產茹筆鐘樓市雖出
劉遠徒妙有宣城致我藏一巨拂用久等篋樊授之使
改作切厲鋒健銳疏治近月餘去索稱不易先生莫促
迫致思容子細中書不中書安用從新繫竭來歛見投
入手知利器文房三貴人刮目喜相視正緣兩資藉辦
此揮洒技吾雖原不銛甘分置散地馳騁翰墨場又匪

老人事不辭束縛坐但愧簡拔意子正來索詩一笑吐
吾喙東老豪穎辭遂擬徘徊戲

送張幼度倅冠州

前年走京師忝與北海薦白首官詞林意若遂少願雖
非玉堂人幸接金閨彥供奉得張子為人良可羨豈惟
文字間辭理見兼善言行兩無擇容度升回轉溫純韞
擯玉樂易不崖岸何心與物忤有問即冰渙宛如鸞鳳
姿肯作麒麟擅相看二載餘謹若初覲面竭來過門別

新除得倅冠坐久兩不懌去住相慰浣我心愛莫留官
屬亦深戀其如行止何物情復多變鑿坡禮文窟一仕
儘清宦古人貴任運況去有三便家近得侍親州孤無
劇辦請益願一言偏倚時揉鍊我忻聞其說解事語不
漫常思歐九說可為後來贊摛文止潤身及物自貞幹
休辭米鹽碎莫厭衙起晏不見忠獻韓鼎鉉出推判行
俟官有程民事不可緩

遊鵞川水谷太玄道宮

迎謁次媯野將為旦夕間尚餘百里遠却得三日閒追陪玉堂翁清遊指仙山窮秋草木盡諸峯慘無顏兩崖蓄餘暖崑樹如春妍洞口疑有光望中已欣然始至覺夷曠稍深更幽寬山英喜客來夜雨濯翠鬟層巒與疊巘供我拄笏看雲封石上鉢

初火道鄺五祖者逃難此山衆追及弃衣鉢石上而

匿其物重衆莫能舉衆為異遂請主其教今道院蓋鄺生所創也

玉漱山腰泉濯漑滋

樹藝一脈窮灣環西臺頗峻絕兩折躋其巔詩翁見精健登頓不作難礧礧凜凜莫留松風吹袂寒降阿集情䟽

高談渺孤攀山荒苦無稱似待新詩傳諸君垂橐來相
載風烟還因公得勝賞此詩其可謾但恐雲霞舉暮景
去猶慳我非桓野王今識東山安

題筠菊亭

有客昨過門挾卷攜酒壺我老厭人事汝謁將奚圖自
云有老親倦遊樂間居終年築亭圃筠菊心所娛二者
諒微物一日不可無餐菊制頽齡種竹來鵷雛牀頭幾
頁書隨意日卷舒欣然有所得聲鮮忘朝晡脫畧少年

事呼鷹走韓盧治生不求富教子供讀書近隨計吏來
一命沾堂除南歸不徒手豈計已與俞眼中倚門親慰
浣當何如瞻烏噪乾鵲過戶縣螭蛛竹色動虛牖秋香
滿庭隅計量到家釀山槽滴珍珠江山漢陰國耆舊稱
名都從今王氏亭而與吾孟俱題為五字書捆載樂有
餘路教為再拜歸當勝吾廬

陪張右相祭奠司徒忠懿公墓

王城西北郊有山曰盧師岡遠見蟠互野曠欣平夷我

嘗以事來旋軫思遲遲匪緣蛇虺靈不羨風烟奇有懷
德育公攀附隨潛飛一朝際風雲振耀生光輝我初拜
英表富貴非公誰內焉幽國助上焉兩宮知孰云恩澤
侯以德中自持近侍足恭謹接物餘謙撝由家化而國
在理乃所宜及夫司徒公衍慶尤熙熙再世保傳功大
書見豐碑神龍襲九淵奮起須鱗鬣伊公漢大橫庚庚
隱天機歷數既有在大器將安歸君王自神武監撫非
細微寶章猶傳璽啟沃貴知幾堂堂忠愛心畫此廟社

規其報宜伊何子孫保無期倏歛三十載山丘兩巍巍
生死固常事盛衰有足疑昌黎銘殿監所以含餘悽我
老自多感黃鳥聲正悲駐車不忍去日下山烟霏

書日者卷後

稔聞日者名不識詹尹面共云推未來符驗如契券因
之求題詠有學難自銜郭生序已詳奚待余眷眷雖非
青囊翁嘗讀李生傳為憐長沙傳三策動漢殿及夫行
藏間而抱不遇怨絳灌夫何為藝能止自羨弗思前席

夜有舌不少噉况彼倭倭徒能不逐利轉正直神所與
言行士之觀悔尤兩克寡祿秩中自辦宣尼敞亨衢天
理不吾謾山人有來問此語告無緩庶剗萬有心一聽
三聖斷

題張氏先塋記後

禹城張氏先起跡自農伍力田與孝悌內助半賢姥夫
婦人倫常松竹表寒苦柔姿不易立流離復艱阻隻影
攜孤兒避地韓城鵠飢寒兒不知採拾治絲縷訓育至

成人衣食能自取去着仙人衣春風三十許若將終其
身一室老環堵天其表媼慈再世沾煦嫗蔚為庶門清
在野不多覩南薰吹棘天衣冠見楚楚孑然九齡迪信
厚稱幹蠱或欲以節聞顧視為告語近名道家忌此事
莫予吐夫家已不幸在我分當處里南築幽栖竹木映
庭圃還我浩浩天香火湛靈府晨昏省定際迪也禮容
與一朝委蛻去神光照東土我紬石室書逸事須世補
國初迄元貞節義幾人數豪族易昭晰里俗多草腐況

保晚節難往往變所素猗歟望亭君雅志遂初舉凜凜
百年間毫髮不少沮竟續所天家時祀必遵俎豈惟勵
衰俗清風激千古裁文為歌詩流詠徧齊魯

送張勝非任汝寧府判

汝流漾玉虹望入東南楚雲連懸瓠城形勢見今古有
鄉以龍名旦評擅諸許山川氣不易舊蔡變新汝名芳
土亦馨理在物爭覩張生太史屬三載戰文圃開朗中
有為一變至于魯朝來得新除破甕起欲舞踵門來告

別一言求小補試將吾已行聊用勉君舉吾年四十餘
彈冠判晉府通宵思闕遺未明聽衙鼓上馬事官長下
馬宿民苦簿書雜米鹽塵土相與伍抗容不少倦公散
日常午任責在人先見得思義取爭輸公堂益不惜寸
金吐堂堂五十城利病繫區處心平知所宰有衆孰敢
侮御史至東溼未省聽渠主最憐絳陽獄五歲閉幽圜
一朝得其情久旱霈尺雨當時官府清至今傳好語評
來一宴過蓄縮畏於鼠正緣中省嚴經制得其所後來

府無人所事盡乖忤官寮自茲壞政荒歲飢阻每用誠
平生艾服繫其矩皇家重師帥爵祿不輕與汝寧本寧
安未用厭勞拊聲華月旦評粲粲珠還浦補缺公與卿
去去力當努壯心橫落日高歌當梁甫

壯士吟題郝奉使所書手卷

使節駐淮海人望兩好熙宋人足變詐觀望占成虧不
知破武事中伏混一機壯士死則已不死將有為宋琚
凜風概天馬不受羈拘隔一館間激之見連雞事久變

乃生勢去心恫疑奄奄十六年慘悴甘湘纍內開既首
鼠外侮宜紛披盛氣屈使降壯心終不移睨柱欲碎首
忍見王人微松嚴操愈厲草綠秋更萋蕭爽隱霧豹脫
略觸藩羝老賊在一殺幽憤將何施庭芝一援手所惜
良不貲兵交使其間天理或可期子卿才屬國所報亦
以卑至今郎山塚突兀空蟠螭兩行清汝帖只有老天
知

送徐平叔還廣平因次其韻

全趙古多士炫服見吾琛我生自有命其肯枉尺尋結
交半豪右翔集依雲林當年平津閣箕冠明月簪乘時
頗展翼天高氣橫參談詩似高適走翰驚陳琳忽騎將
軍馬縛賊虎穴深嚮來三數公朱絃得遺音長劍一搏
酒洒落開雄襟自笑我何有踵門來載臨袖攜長沙書
囊乏魯連金白髮老親健晚境毛義駸時清竭明略有
義多同衾躬耕食不足從仕力儘任秋風吹易水游子
動歸吟深藏會有待莫負平時心

題焦節婦卷後

焦氏有賢女姿稟與衆殊既笄樂貧素出嫁南征夫一朝聞卧病尋訪邊之隅怙恃力眷挽在妾夫何如竟能遂初志扶喪歸里閭朝昏事蠶織恭侍舅與姑百年終孝養葬祭何勤劬拊畜兩孤幼嫁娶禮與俱孫門固衰謝賴一貞節扶夫婦人倫始因之變時污一端青穀信至死誓不渝采詩論國風彤管宜沾濡誰謂閭閻間凜此風烈娒猗猗谷蘭馨落落青松孤豈惟表門閭抑備

太史書達卿昧平生容齋文可娛美節冠東州亦用播
友于清風振孤標讀者宜嘻歔

送許澹齋提舉隆興學校

我初入玉堂喜識澹齋面忠翁兩朝士極口為稱羨子
遠東嘉人文綵金百煉妙年登巍科巧宦歷幾遍風儀
聳四筵目光雙炯電前年來京師得遂依劉願校書天
祿閣音吐見雄辨長河瀉建瓴洒洒江左傳三釜固祿
微一官爭鶚薦行李日羈栖猶是多士冠今來得美除

提舉江西彥在吳到朝行客燕頤詞翰洪都儘經學文
藝業多擅好將鑄顏手主善志無倦習俗與命脈風雅
為一變江烟送行舟瀟灑離亭餞清吟代驪歌別思空
眷戀依依鄉國情去逐南飛鴈我老歸未得松菊夢秋
澗衣冠拱清朝榮焉珠會弁自慚老無能零落秋風扇
君行重感慨黽勉磨鐵研長江控高閣百丈驚井幹梅
花散春妍蒼烟開禹甸江山有清眺風月興不淺南昌
地卑溼衆流爭湊衍去年水為灾孤城江四轉兒童化

魚鱉萬竈產鼃龜慨然為開陳此事豈小便一鍾濬東
湖澄江靜如練淡齋素有為肯遣空懷卷

觀臺鄉劉氏瑞蓮

遙遙觀臺鄉近接魏西園風來紫陌香臺傾金鳳去繁
華一夕空風物猶可據劉君號素侯林野敞亭宇貯藏
物外春中有百花鵝池開一泓多雲錦漲秋渚亭亭玉
井花十丈冰絲比一茄十三蘢秀發乃如許輝映天泉
淵飄洒橫塘雨風流似六郎澹艷疑靜女高情太極翁

愛玩吐奇語根植污泥中香韻儘容與褰帷對佳麗淩
波看微步烟霏動簾櫳漢女出歌舞當其爛漫時固已
表雙舉豈惟見家祥分秀孕先母重臺與雙頭連莖同
合跗封章稱嘉祥夸者徒媚嫵由來草木蕃造物不予
侮氣蒸物自盛事異未之覩百年霈遺澤宅相煥圖譜
君家邯鄲望馬服迺鼻祖諸孫藉餘慶雋拔一何楚起
家漢賢良接踵泛萼府一門集清芬嬋娟富簪組為君

續夷堅作詩劄石鼓

滄陽有石鼓山

蒲城行

效韋蘇州體示
異姓弟喬百順

蒲城今樂郊兩翁處東西相別二十年
顏鬢甌以悽加餐似平時捨杖矜健移
置酒前拜壽喜定垂涕淚擁膝侍終
日念不共提攜幸有聶與喬治生事鋤
犁云誰知異姓一作派孝養日孜孜雖違
心獲安慰我悠悠思官書促前去望入
雲林低

黑山秋霽

我度居庸關天峽四十里巉巉積鐵色
兩勢蒼壁倚何

由剏疊巘一撮峙燕几長令幼輿心喜溢秋壑底竭來
遊京師訪友棠陰里入室得茲山欣躍倒雙履攜歸坐
卧觀論列忘兩紀黑山凜冰尖玉色何粹美連峰卑高
陳夾嶂蹊逕逶遠勢走脩坂秋骨濯清泚絕巔蒼穹盤
哀壑太妃圯奇狀出天然弃墨妄模擬又如蒼間虎怒
伏驚獵筆昂頭入四顧徐起妥蒼尾書生眼孔曠百見
心未已不為此倂顏照映橫玉壘烘香作怪供揚解問
山鬼不知天壤間劉刻此能幾魁岸狀木假甲乙第湖

玼達人有大觀太華拳石比曾為物外誘沾沾抱徒喜
屹立萬物表景行世仰止詩成贈山主我豈鬱林齒巖
棲未有期對此聊爾耳大開致爽軒挂笏約吾子

秋澗集卷五

欽定四庫全書

秋澗集卷六

元 王惲 撰

七言古詩

舒辟劍歌

為太常公弘衡賦

龍泉之精老蛟血躍入洪爐凝夜雪至今元氣老不死
粲粲碧華浮兩脅雀環金錯赤絲絛蒼水夜擲天為高
或云徑度海西陲佩非其人有所歸夜飛入燕人不識

天以神兵示中國宋侯磊落書中傑碧眼風胡物情格
窮幽抵秘竟圖經羽窟崑崙騰口說黃金臺下喜相逢
醉眼高歌得玉龍摩挲神物萬金重箕冠傾倒琉璃鍾
蹇予元年燕市客走馬來觀嘆奇絕雪屋燈青寶匣開
紫氣橫衝箕尾滅悲風凜凜入座寒山鬼吹燈中夜熱
當年天矯龍性在入手無方恣舒辟金精固列五材首
堅質柔資苦差別彼人之性而與同太柔失威剛則折
咄嗟此劍陰陽全雄雉雌鵠俱赫然君不聞淮陰未遇

賤且貧愛而服之良有因無何大遭跨下辱亦如此劍
能屈伸一朝攀附赤龍飛六合風雲入指揮漢家日月
四百載亦從此劍騰光輝宋侯篤我卓所立一日三看
曾不惜我今作詩私自激重為歌之感疇昔多君振厲
義且誠羨君小試妖氛清三年盜弄潢池兵亞夫持節
東南征此時宋侯佐戎車一揮逆儔生白鬚縵纓短衣
非我事談笑自有聊城書斬繯歸來苑屋底拂拭海西
心自喜不須夜半舞荒雞得君亂絲為君理况君天富

席上珍胸蟠萬卷餘經綸天王未入非熊夢此劍應須
檢子身

飛豹行

中統二年冬十有一月大駕北狩

時在魚兒泊

詔平章塔

齊爾以虎符發兵于燕既集取道居庸合圍於湯山
之東遂飛豹取獸獲焉時予以事東走幕府駐馬顧
盼亦有一嚼之快因作此歌以見從獸無荒之樂也

子時為左
司都事

二年幽陵閱丘甲詔遣謀臣連夜發春蒐秋獮是尋常
况復軍容從獵法一聲畫鼓肅霜威千騎平岡捲晴雪
長圍漸合湯山東兩翼閃閃牙旗紅飛鷹走犬漢人事
以豹取獸何其雄馬蹄蹴麋歛左興赤絳撒鏃驚龍騰
錦雲一縱飛塵起三軍耳後秋風生豹雖逸才不自惜
雨血風毛摧大敵風烟慘淡晚歸來思君更上單于臺
血埋萬甲戰方銳爪牙正藉方剛才古人以虎喻天下
得失中間係真假元戎茲獵似開先我作車攻補周雅

大笑南朝曹景宗誇獵空驚强霹靂何曾夢見北方强
竟墮閑車甘偃息揚鞭回首漢家營一點搶纓野烟碧

匹紙歌

謝王道人子寧

楚山修竹森如玉千杵鳴礮響空谷溪翁鬪巧紙愈佳
淥泛秋江連百幅春斂籠燠素練輕鳳梭停織天孫顰
聲光一日天下白萬古作配中書君道人來自蒼陵天
名品閱盡東吳船惠然贈我以此紙入手展放銀河翻
脂凝玉瑩絕纖滓風流綽約貌似姑射之真仙扶餘綿

繭固堅膩中有雲影霽霽浮秋瀾金華五色非不佳不
放墨松使者光通玄何如此君貴重百金比當與澄心
玉屑並驅爭後先媿無少陵詩魯公筆如椽揮毫一掃
空雲烟文章元氣古無間玉堂人物今翩翩此而不贈
返惠我夜光暗投真可憐道人一笑春生頰琢腎雕肝
爾心折千首新詩意未窮分取烟江愁萬疊我今靈臺
久荒穢老樹秋蕪餘廢垤何時除治若此紙一片冰壺
貯秋月深藏且須珍惜之準備虛堂夜生白

金馬門行

十年金馬門中客，萬里風雲橫上策。
貂蟬要自出兜鍪，拏舟渡江江水窄。
新豐樹色繞千官，一片丹心懸魏闕。
洞庭白波木葉下，千里臨江思飲馬。
堂堂大帥晉龍驤，聲振南陲無呂賈。
止則如山戰則克，更著君侯參幕畫。
淮陰何止一軍驚，滿眼旌麾動秋色。
萬竈連營楚戍烟，一樽回首銅駝陌。
功名年少貴力取，行與諸兄垂竹帛。
蹇予久事筆研間，天東倦客未能還。
夢回破屋見星斗。

商聲夜半歌南山虛名不到麟閣上白日能飢苜蓿盤
何如乘此長風去濁浪吹破東南天

相從行

贈宋兄弘道

宋君茂異誰其儔事業當向前人求羣書磊落載其腹
人道聰明似鄴侯黃陂千頃不足泳入海簸弄龍驤舟
十年霧豹棲巖幽每恨南海北海風馬牛碧雲望斷西
山陬愛而不見心為憂向來文采珊瑚鉤寧胡一曲不
自休

公嘗作寧胡關氏曲行于世

壯懷似欲寫孤憤筆力倒挽西江

蚪古今樂府非不優例以哀怨更相酌蛾眉命薄黃金
貴青塚凝雲紫塞秋多君變體不師古一掃萬古琵琶
愁我忻得之三過讀如入武庫森戈矛乃知鳳凰在岐
世自瑞春風百鳥空啁啾乾坤吾道方悠悠天公畀子
鳴中州喚回海嶽三生夢獨倚元龍百尺樓今年冠劍
平津閣積憂一見心為廖識君恨晚愧全志正似羔羊
之鄴緣飾青貂裘古今為諱分清流不用倒翻鸚鵡洲
期君有道興東周不然君為龍我亦同雲浮自茲攀逐

不相失四方上下從之游

南風謠

送董瑞卿之鄧州軍幕

南風不競兵塵鏖兩淮春燕趨林巢吾皇明見萬里外
欲以德服兵無勞已聞灌莽極目地方屯春事開林臯
紫髯將軍賢且豪智略往往超龍韜一軍壁楚號勁利
眼中勅敵無劉曹今年分閫鎮鄧鄩旌旗改色天為高
芙蓉幕府固多士更以厚禮羅英髦君侯漢庭選經濟
夔與咎揮畫乃餘事白羽風蕭騷年雖哀樂境兩鬢無

霜毛如君名宦不可逃繡花未滿千金刀鸞鳳忽爾辭
蓬蒿此行莫起觸熱嘆將軍好士心忉忉得君豈止解
鬱陶投竿如掣東溟鰲飛賤走翰鈴閣底駸駸欲逼令
家絢秋風鼓角驚江濤軍中氣和投楚醪兵家耕戰諒
有待雷雲隱伏池中蛟一杯漢水春蒲萄楚人雖猛輕
秋毫知君談笑辦此事長江聽渡龍驤艘長江聽渡龍
驤艘

長劍行為王子初賦

老蟾破雲光走庭清風西來散幽局北斗芒寒色欲見
太白睽爍無光晶燈前忽值蒼水使示我寶劍喜且驚
芙蓉匣開吐奇怪分光盡萃此劍之精英蒼虬翻風白
日動秋水背露龜鱗青昔之所遇今乃愛覺我炯炯雙
瞳明青衫試拂拭硯磊難自平平生疾惡腸為爾芒角
生我聞乾剛甲五材鍛成玉龍復以首利庶物稱佩非
其人尚不可況乃用之高庫而無經君不見趙文失所
好日夜徒擾曼胡纓朱雲伸其請折檻反取訕訐名劍

之於人無適莫用之得術如雷霆又不見周公管蔡舉
謗息四國寧聖師兩觀誅正大貫日星遂令千載下妖
腰亂領寒於冰引杯感古我自惜儒冠突鬚嗟無成之
子風雲士慕蘭如長卿飄飄四方志早以文章鳴君與
劍無久蟠決雲會看昇青天黃金錯環蒼玉佩攬環結
佩天王前慙懃祝子無多言不誅已然誅未然

雜言喻為彥政失子作

堂上慈親頭白絲慰心賴有寧馨兒巉巉頭角日方露

誰揮如意擊碎珊瑚枝不知與奪果何主變滅歛歛無
旬時驪龍失領珠海窟黯慘鬚眉垂老鶴憶別雛淚眼
叫斷秋天低彼蒼塊圯於我本無有何事誕說立象為
鑪錘陽春艷艷木自榮非春一一點化青紅姿秋風蕭
條羣木脫物感秋氣彫悴又匪行陰機乃知生死天地
間花開花落殆似東風吹蜂房魚腹得至理子夏失明
傷天彞西家因果蠱流俗東家聞之為朶頤蕃延疎薄
無定分慰懷當取昌黎辭父子自天性東野能不悲君

年正鼎盛情鍾感非宜況夫先子澤渾水清而漪吾友
賢且孝舉案加有梁鴻妻捧檄為親屈晨昏歸來侍庭
闈我聞善積有餘慶他日當有螽斯詩

湧金遊

并序

予回轡共山有客過而問曰湧金之遊樂乎曰樂矣
不無詩乎曰無有也客曰事樂會之於心心樂寓之
于口且蘭亭之勝至今尚為美談者其以有託於斯
文也客退於是乎書長短句以歌時孟夏十四日也

曉雲拂山山氣昏坐來萬壑烘朝暎丹崖翠壁畫莫出
但覺詩境供愁新地靈祠古秘幽怪天授神柄專其尊
年年簫鼓祠下路東風十里楊花春我來愛此山水窟
天氣著物清而溫漫金亭上一礮礮主人留髭醉金樽
水邊滉漾多麗人往來但看珠翠裙不知仙家足奇貨
明珠脫串一一浮出摩尼真波間可翫不可掇雲錦翻
動玻璃盆書生潤身那羨此席上正有吾家珍舉杯酌
水但默禱山靈垂意哀王孫願分秀色貯詩腹一洗萬

斛胸中塵仙官有請固不拒山鬼竊笑君無因不然結
茅傍修竹雲烟占斷西湖曲月明舒嘯碧山巔喚起公
和跨黃鵠

秦川行

送張孝先

北燕豪俠南州客去歲辭家今八月霜風偃薄一貂裘
不為無金少顏色平生弓劍只餘事滄海風雲居上策
今年棄繻復入關春光澹沲迎征鞍周侯磊落天下士
橐鞬賴子為周旋我知黃鵠志千里此舉橫絕青雲端

長安西望白日近解鞍多在清明前新豐美酒斗十千
長樂坡頭楊柳烟曲江花滿樹春風怨啼鵲對時感慨
能不動鄉思丈夫有淚肯洒離別間驛驢得路足神駿
我非繞朝愧乏黃金鞭君不見古人勲業貴少壯莫待
拊髀悲流年

東方碑帖歌

謝子初

魯公筆法天下雄東方一贊其猶龍嗟予愛之力莫致
夢魂幾到平原東我雖不解書慕此忠義風有唐天寶

初禍首營州奴羣兇一朝起氛祲連神都二十四名郡風靡隨盜區堂堂顏使君徇國思捐軀竟以七千衆不為邊塵汚乃知大節初不以藝自殊胸中義氣蟠不盡往往翰墨攄其餘況茲游藝君子責古人以字為心畫先生不知作何狀覩此寶墨事可測書學到君稱絕筆凜凜英名貫星日晉漢名書凡幾家奄奄為君皆敗北宜乎眉山公謂此能事畢出於右軍擴以大比並離堆當第一秦氏龍蟠古井波將軍虎卧南山石又如大人垂

紳正笏廊廟上忠厚之氣了弗事緣飾嗟此至神物每
為好事得君家父子賢向歆只今好古喧詞林幾年秘
此分賜我拜嘉不翅千黃金君心若此真尚友我報愧
無瓊與玖歌成大笑不自量擬與君名傳不朽

墨竹歌

為共處士持嘉

吾生愛竹兼嗜石手不能書漫成癖憶從林下七賢游
終日摩挲弄寒碧山河一自隔黃壚塵土填淤百憂集
得君此畫忽洒然元氣淋漓障猶溼滿空月露下寒塘

人去山陰鎖幽寂又如湘妃廟前風雨晴翠袖紛披山
鬼泣幾竿迸出太古崖老節雪欺初不惜表將一片歲
寒心不與繁華競朝夕東欄牡丹鶴翎紅西沼芙蓉紺
珠色歌鐘傾國樂芳年以色事人能幾日何如鴨江居
士詩骨清而臞手種此君忘肉食不須拄杖敲人門萬
斛清風破窗北月中看竹掃秋影妙得於心發之筆興
來落紙出塵表擬學湖州滅形迹嗚呼湖州已矣蕭郎
遠今代名家淡游客君不見李杜文章萬丈光一日齊

名偉高適

乞雁歌

呂東平江海客一鶚盤霄鷺空百老來機械淡相忘雙
雁隨行聲格格階除得食藏頸眠惱不及鄰甘亂聒兩
堆晴雪春不消暮映書窗生夜白終朝司警代黃耳夢
破烟江秋拍拍主人對之心愈閒感念物情終桎梏家
中又厭食蟻蟲一夕籠歸山下澤今春卵哺衆雛息百
日已能過所出青山滿眼映一羣泛浦眠沙白勝雲稻

梁棲晦秋正美約我充庖潔口殮能鳴見害古所惜我心念之生隱仁勸君深藏養子刀解縛歸來養雪毛右軍閒適久無伴許贈一隻相與遨西溪秋水深幾篙江天漠漠秋風高歸飛不隔暮雲遠放爾縱觀心亦滔俯歌雙雁行仰送孤鴻杳洞庭歸客渺無音萬斛羈愁坐中老節旄零落瘴海烟冠蓋都門開昏曉我欲因之附尺書西北烟塵靜如掃

夏夜晨起理髮

時目疾新愈

居閒早眠復旦起繞樹行吟殘月底鄰雞聲裏候東方
曉色難人氣清美雙瞳自為苦所纏兩鬢鬚髻曾思旦理
青絲髮散滿肩雲千梳未暇百梳勤餘邪細逐老櫛散
風露氣入秋蓬根疏通百竅勝新沐一洗耳目清而明
朝有蠅子暮有蚊事隨日出更紛紜侵晨有此至良劑
肯羨卯盃松醪春詩成因謝草堂客嵒康養生非妄論

衡門行

送陳長卿

衡門棲遲樂吾樂甘著流輩譏東閣長河其奈不療飢

誰暇物情論厚薄前時行臺領漕計處士半為餬口起
長年巨鼠有餘壤比比吾儕廢生理嗟哉陳君何苦節
天東游子天西客監河勢去餘業在客舍半掾淇水側
書生辛苦學干祿入手青衫得藜藿塵埃風雨蹇驢瘦
日就空倉自羈縛今年幸得解脫了超海挾山初不惡
暮春之初日東作陳君叩門聲剥啄向予長跪話遠行
上計又須趨薊朔攜書五車煮不堪舉室舟行更蕭索
前因未必是亨衢著脚如堪戒前錯若於金粟例言拙

誰著裴劉供調度逢時正有利不利有命豈論前與邵
長歌西北酒一杯浮雲漸遠天寥廓東曹若見王春官
道我行藏事如昨幾年奔走一墮甌蕙帳歸來慚怨鶴
濟時幸有公等在擬把一竿尋釣壑因君悟我向來非
相送出門還一喙

大電行

至元四年五月十五日也

雷師掠地西山麓北會豐隆出蒼峪崩雲掩落赤日烏
烈缺光騰燭龍目黑風駕海天外立萬騎先聲振林谷

雲濤怒捲惡雨來中雜冰丸幾千斛殺聲咆哮屋碎瓦
百萬神兵自天下奮然橫擊合陣來昆陽之戰何雄哉
又如馬陵之道萬弩發天下雨如無魏甲斧形鷄卵見
自昔異狀奇模此其匹野人庭戶變綃館霧湧烟霾與
龍敵又疑鮫人泉客泣相別淚洒珠璣恣狼籍葉穿鳥
死庭樹慘禾麥擊平驚赭赤神威收斂俄寂然瀟瀟合
浦還珠聯整冠變色立前廡但見土窩萬杵一一皆深
圓五行有占非小變調元失所誰之愆又聞夏冬愆伏

之所致亦以坎治持化元孔子修春秋二百四十有二年
特書雨雹凡兩次大率敗黜臣下侵君權況今朱明壯
陽月胡為縱此羣慝之所顓厯關上訴九虎怒蟻虱小
臣非所言獨憐田家被留者寒耕熟耘手足成胼胼差
科大命寄一麥盼盼見熟療飢涎一新到口不得食哀
哉何以卒歲年

捕魚歌

塢西溪水深及篙漁戶曉集拖輕舫縱橫張網截兩溪

挺义遠混驚銀魴柳陰潛涔深且密大魚小魚爭遁逃
須臾合網環深碧薄搯提網從掇拾小魚骨罌半死生
口頰噉喁無足惜就中一魚匪常材黃金作鱗尾砂赤
泳游本在孟津居波蕩江湖事行役中塗遇厄夢不神
騰躍舟中有時立漁郎迴艇催歸急幾處金盤待鮮食
夕陽澹澹洲渚空回風蕭颯溪神泣網罟設兮水不深
惜物之君戒貪得古人數罟不入池以時漁捕須盈尺
今人古道棄如泥竭澤焚丘意方畢野人有樂在濠梁

澤畔行吟三嘆息

宿仙山朝元觀題示

太行北走開四門川原落落風烟屯仙山西峙如虎踞
石嶺東抱猶龍奔道林中蟠百餘畝顧揖殿寢何雄尊
仙翁得仙事惝恍碧霞洞主玄元孫百年朝元去不返
寶籙秘泄風雷燉陰雷訶護石壇古老雨溜漬蒼苔痕
緬懷矯矯東瀛老變化能大天溟鯤謝公本是濟時具
誰使卧老東山墩豐碑不愧蔡邕筆再拜遺像儼以溫

我來夏交樹陰翳萬橘翠瑣芬蘭蓀平生素有林壑癖
苦厭闌闌埃霍昏每來福地愛蕭爽跬步乃與仙凡分
山川景氣得入勝喜對羽客開清樽夜深靜卧月東出
林影布地翻瑤琨天風吹空萬籟息明星當坐手可捫
恍然入境兩奇絕月露一洗清心魂世間塵土幾千尺
有夢不到瑤臺垠人生幾何胡不樂例自跼束駒服轅
惜哉清景不可駐一聲啼鵲開林烟明朝人事隨日出
坐看蟻穴蜂衙喧

雁門公子行

贈李仲明萬戶

鴈門山高幾千仞，風土雄尊號全晉。
君侯年少出紉袴，裘馬輕肥冠時雋。
古來豪傑數幽并，柳子不須誇晉問。
蹇予三年東魯客，塵滿青衫鬢雙白。
書生無策伴侯鯖，尺蠖泥蟠甘退縮。
此時全君幕中游，袖手旁觀看超越。
條籠脫落不受羈，意表出奇人叵測。
健於豪鷲快一擊，霜翮盤雲驚空百。
愛君肝膽向人開，遇事剖析無留材。
世人荆棘塞靈府，末事掛眼生嫌猜。
丈夫特貴氣為主。

行義不虧誠可取區區心計米鹽間東縛真為抱官虜
相期心事李西平錦韃家世蜚英聲天其藉此作事業
未害蹉跎魯客卿眼中人物真知己舉世論交多逐勢
贈君一片百年心意氣相傾岱如礪羨君才氣真英耳
鬱鬱安能久于此烟華紫禁正縈繞臺閣羣卿半鄉梓
明年焰焰動北方騰踏風雲乃吾子

贈田生赴監河之召

田生操履凌高節三載奔馳秦隴月長年愈覺世事艱

中道毀車思遠業故人戀戀監河侯願分斗水相為留
古人有志患不立抱關擊柝非所羞君不見黃河一尺
鯉風濤終化禹門秋

贈孟祝史德卿還燕城

孟侯落落明時佐從祀歸來喜相過探囊擲下珊瑚鉤
海岳英靈驚甌墮淋漓元氣星斗光照徹龍淵得奇貨
我初把玩三歎息不覺秋風吹屋破太一真仙令綺季
入奏行宮瞻紫氣受釐宣室想所陳不獨碧雞金馬異

朝家望望董賈賢祝史孟君今偉器明年艷艷動北方
館閣風生驚一世因之啟賀廉行臺為國得賢真宰惠

題韓幹畫馬圖

韓御史君美所藏索賦

火輪凝空汗如洗日坐烏臺簿書裏韓君忽出天馬圖
蕭颺朔風生駿尾吁嗟此馬來西極細看一骨千金直
當時開元監牧盛赤岸千羣雲錦織奚官袍帶蒼髯戟
碧眼深藏九方識豈其此骨獨當御轉盼君恩仗前立
幾年扈從東封還霜蹄蹴踏長揪間驪山武事厭不講

剪刷日應供帝閑鸞旗百里臨潼道華清宮殿春風早
黃金羈勒玉華駿遊幸君為玉環老幹時供奉屬車塵
思入星精奪天巧興來承詔貌真龍冀北驂騮歸一掃
古人畫馬需神品骨相權奇氣深穩將軍曹霸幹所師
萬古丹青少陵引韓公得法固入室十丈光輝誰所準
自今題品雪堂仙韋偃龍眠徒滾滾嗟予何者牛馬走
開卷賦詩還自哂韓卿朝騎御史驄暮擊凡禽健秋隼
更煩牢鎖玉麒麟隄備雷轟秘本

梁秀才惠橙

梁時在制中

卷六

君家堂前橙兩株
汝父當年手親植
洞庭波兮霜滿林
摘惠晴窗慰幽寂
夜堂張燈動春酌
脫帽驚呼夢疇昔
摩搓兩手三日香
感舊懷人淚霑臆
一雙照耀黃金苞
露香冷落銀觥挑
呼兒走問隣牆酒
早晚珍珠滴小槽

三勒漿歌

有序

唐代宗大厯間
幸太學以三勒漿
賜諸生此後不
復聞於世
今光祿許公復
以菴摩訶毗梨
三者釀而成

漿其光色油然如蒲萄桂醕味則溫馨甘滑渾涵妙
理及薦御天顏喜甚謂非餘品可及遂以時供內府
不肖以霑漙之餘發為歌詩以見國朝德被四表萬
物畢至之盛許公愛君之心以湯液醪醴躋聖壽於
無疆之休也

金天一氣何奇特異品珍材表馨德翠籠萬里入貢來
赤佛堂西漢家邑異哉三勒見圖經祇解有靈能愈疾
豈知用外藏妙理瓊醴蔗漿非所敵誰傳釀法自太古

滿甕春雲元化溼就中至味真玄酒豁達靈根三益友
許公得法神所傳一醞天成漢重酎儀狄拊掌者伯驚
五百年來未之有芹香背炙固區區推以愛君忠且厚
彤芝蓋影擁紅雲湯網初收在靈囿月華冷落露盤冰
三蠟芳溫挹大斗金壺潄灑承案不能餐我輩何功飲
天自

秋澗集卷六